

奏定學務綱領第五十條及五十四條內無庸另議又稱學堂給發卒業文憑應兼列教習銜名各等語查外國學校本有此辦法應請俟將來給發文憑時參酌辦理謹 奏

出使日本大臣楊奏陳兼管學務情形摺

竊奴才欽奉 恩命兼管游學生總監督受任以來兢兢業業既不敢務爲覈刻阻學生進步之機又不敢過事優容長學生囂凌之習因擬經權并用以期調劑得宜茲謹將辦理情形謹爲我 皇太后 皇上陳之緣近數年間各省官費自費生到東游學者日增

月盛其中循規蹈矩專務學業者固多而縱性任情好爲橫議者亦在所不免此等學生均應善爲開導使之改良勢不能遽繩以法蓋出洋學生與在內地者不同遇有事故其法權須操之外人也然監督平時接待學生亦不可過於謙抑輕於然諾誠恐過於謙抑則學生有藐視之意輕於然諾則學生有非分之求求之不得則以小事衍作大題多方挾制名爲動公憤其實洩私嫌慫恿多人聚而生事迨至事體難以轉圜不得不告之外人乞爲捕治夫以己之學生竟至乞捕治於外人未免貽學生之口實致外人之譏評甚非計也奴才之意以爲學生不憚勞苦遠別家室負笈東游無非欲學就通才歸而致用爲監督者正宜自處若父兄視之如子弟時時愛護事事體恤其有銳志向學者則獎勵誘掖之墮行廢學者

則警覺提撕之務必動以真誠自知感愧既知感愧則知敬畏雖有桀驁不馴之氣亦漸潛消奴才有見於此故於學生之到署請謁必隨到隨見無所阻拒並親詣游學生會館傳集大衆演說正宗大意是勸勉各學生共抱忠愛之忱勿蹈詖邪之行其湖廣督臣張之洞奏定約束游學生章程亦經雇匠刊刷多張分給各省游學生遵守奴才聞日仍親率參隨各員輪流到各學校考察各學生課程各學生如有切己之事應爲料理者亦准其隨時面稟總期上下情誼息息相通不致分疏勢隔互啓猜疑至各學生遇有受人欺侮者查得實據必爲之申理以故各學生多心悅誠服邇來甚屬安靜并無譁張爲幻之事第念各學生品行之優劣學業之勤惰非詢之校長教習不能得其底蘊因與各校長教習時相接洽而各學生見此情形倍加勤慎奴才現查得各學校共有中國學生一千三百餘人其中學文科者一千一百餘人學武科者二百餘人其數不爲不多然奴才樗昧之見以爲日本陸軍經營數十年成效最著中國似宜添派學生來東專送入陸軍各學校以期成就遠大用濟時艱曩者日本陸軍諸將佐曾與前總監督汪大燮言及中國學生在陸軍各學校肄業者係由陸軍大臣奏明日君撥發庫款添建屋宇加派委員教習別給薪俸使專理其事第中國於此等學生時派時止或多或少頗難辦理嗣後宜定額數每歲或派二百人或百餘人

或兩次或一次分班來東入校肄業則屋宇俸薪不爲虛設等語近日諸將佐又以前言向奴才面述具見彼國實有期望中國振興陸軍之意攷日本陸軍教育係以忠君愛國順服長官爲宗旨并無侈言自由與政府反對之弊惟是學陸軍者每歲所費較多於學文科者數倍非自費生所能備辦似宜以官費培植之俾資造就卽如日本現在尙不惜鉅費歲派成材數十人游學歐美其用心深遠可爲借鑑查管學大臣張百熙等近已 奏派學生三十餘人來東送入文科各學校肄業惟當此列強環伺我圉孔棘武科較文科更重未可緩圖雖各省督撫近亦有選派武學生來東肄業者然爲數有限恐不敷干城之選應否 飭下各省將軍督撫於世家宦族內遴選文武兼資之少年學生添派來東分定班數人數送入陸軍各學校肄業以廣將才而資錄用之處出自 聖裁再查各省游學生近日均知朝廷興學育才之意至爲急切多有爭自濯磨以期學成見用者奴才仍當隨時認真約束考察并將未盡事宜咨商管學大臣暨各省督撫妥爲辦理謹 奏

四川總督錫奏請設立軍醫學堂片

再行軍必醫士相隨卽平日星碁列戍不無潦霧熏蒸之患待人療治泰東西皆精此學金創尤奏奇功川省於此闕焉弗講奴才現已在省設一軍醫學堂聘法醫士羅尙德充當教